

Ak, to, Juoni...

Kuoks žvaigždiets vėrš žemės dongus?!
Vies rītėnis svėlėn žondus.
Žemė sošāla jau i rāga...
Kas tik gīvs pajota bāda.

Velkas i nomus ėr Juonis –
Nosėmėnės, be Petruonės:
Ta juk pernā koknie mērė,
Ka posėnė kuošė vėrė.

Kėik ana, vargšė, prikėntiejė –
Duoruos dėinuos neregiejė:
Juonis gierė, pīpka rūkė,
Kol novarė vėsa ūki.

Kol bova stuora piningėnė,
Šnapšė spruoga ožsėinėnė.
Vo ka ana išpluoniejė,
Muovė tuokė, kuokė toriejė.

Sāva patė liob apgautė –
Vuogtās rėndelės kopšautė.
Kėik jau anū ėr pražodės?!
Tėp darboutėis bova igodės.

Dabā kapūs pati ėlsas,
Šėlka soknė apsėvėlkusi.
Nebrūp ūkis, lonkas, pėivas...
Ni kėimalie tėivas ėivas.

– Kuoks sokriūšės dabā Juonis, –
Tėp rokou miestalie žmuonis.
Vėinor ipėl bolvīnėlės,
Kėts atreikės doud duonėlės.

– Ak to, Juoni, besarmati!..
Petius sleg ėr tau senātvė.
Tuokius tortus to toriejė,
Vo gīventė nemuokiejė!

Kou begausi to ož dīka –
Jau ėr vākā ruoda špīga.
Plaukā raituos pasėšiaušė

Ont noplėkosė pakaušė.

Akis ėrgi jau apžlėba –
Tonkė lėp ont bata kėta.
Net savėškiu nepažĩsti,
Ruoduo pradedi soklĩstė.

Kuojės senė jau išklėba,
Ka kraujuotaka sotrėka.
Kairie ronka, ka ėr kėita,
Nebnulaika Vuonės rėita.

Vo ka dontis praded geltė,
Skausmūs negali betvertė.
Poli vėinor, poli kėtor –
Pjaun be peilė, ruoduos, vėsor.

Strienas ėrgi ne gelžėnės –
Trintėis nebie kėrmėnėnės.
Nebie sĩluos atsėkeltė –
Vo nedėrbsi luovuo pelkės.

Vėskou senė to pragierė...
Sāva kailie nesėtvierė.
Vo ka nieka jau neblėka,
Nier kor dietė tuokė plėka.

Kor to dabā prisėglausi,
Nuors ėr vėršė balso bliausi:
Dabā kuožna muotrėškėlė
Spėr pijuokou i šėknėlė.

Ak to, Juoni, besarmati,
Vėskou žmuonis poikė matė:
Kėik to gierė, latravuojė,
Kap Petruonė moštravuojė.

Kor tuoks sens bepasėdiesi,
Jug iš bada ėr nodviesi –
Toštė viedrā ėr bliūdalė
Svaiduos porvėnuo truobalie.

Dabā vėns pakūtavuoji,
Aplink smėrti pagalvuoji.
Baigies katėna tau dėinas –
Viejė švėlp pro kiauras sėinas.

Sunki dabā tau senātvē –
Vēsus vedī tik i zlasti.
Nuors takieli dā ēr minsi,
Jaunū dēinū nebgroužinsi.